



Coimisiún na Scrúduithe Stáit

Scrúduithe na hArdteistiméireachta sa Cheol, 2017

D'Údaráis na Scoileanna

Féachtar chuige, le bhur dtoil, go dtugtar na Nótaí Eolais agus an póstaer atá ag gabháil leis seo d'aire na múinteoirí Ceoil agus na n-iarrthóirí. Tugtar na nótaí seo a leanas do bhur n-aire freisin:

1. Reachtálfar na scrúduithe go léir (an Teicneolaíocht san áireamh) de réir riachtanais an tsíollabais, mar a shoiléirítear sna Nótaí Eolais atá ag gabháil leis seo. I gcás na scrúduithe Teicneolaíochta, ní mór d'údaráis na scoile deimhin a dhéanamh de nuair a bheidh na scrúduithe críochnaithe sa scoil go nglantar an t-ábhar go léir a ionchuirtear agus a chuirtear in eagar le linn na scrúduithe den ríomhaire (glúine) nó den ghléas stórála seachtrach a úsáidtear.
2. Beidh na trialacha sa cheolchasadh ar siúl sa tréimhse ó 27 Márta go dtí 7 Aibreán 2017, an dá dháta sin san áireamh. Ní mór do na hiarrthóirí a bheith i láthair don seisiún scrúduithe a shocraíonn an scrúdaitheoir dóibh.
3. Más mian le hiarrthóir scoile a bheith i láthair don scrúdú in ionad eile seachas a scoil féin, ní mór dó/di cead a fháil ón ionad sin ar dtús. Ní mór do Phríomhoide a scoile féin 'Foirm PROS' a chomhlánú ansin agus í a chur ar ais chuig Coimisiún na Scrúduithe Stáit roimh 20 Eanáir 2017. Ní cheadófar athrú ionaid d'iarrthóirí a iarrann athrú tar éis an dáta sin.
4. Is gnách go mbíonn na trialacha praiticiúla ar siúl le linn na ngnáthuaireanta scoile. Ní bhíonn trialacha ar siúl le linn am lóin. Is gá na scrúduithe go léir a thosú ag an am a aontaítear leis an scrúdaitheoir. I gcás scoileanna a mbíonn leathlá sa tráthchlár acu, d'fhéadfadh sé gur gá trialacha a réachtáil ag an am sin. **Ní mór** duine fásta a bheith i láthair i rith an ama le maoirseacht a dhéanamh ar son údaráis na scoile.
5. Tharlódh i gcásanna eisceachtúla go gcuirfeadh moill i scoil isteach go mór ar sceideal scrúdaitheora, agus tharlódh gur ghá cuid de na hiarrthóirí a athsceidealú tráth éigin eile le linn thréimhse na scrúduithe.
6. Moltar d'Údaráis na Scoileanna gan tráthchlár a thabhairt d'iarrthóirí toisc nach féidir a mheas go beacht cén t-am a bheidh triail phraiticiúil áirithe ar bith ar siúl. Tugtar do bhur n-aire go gcuirfidh cuairt mhonatóireachta ó Scrúdaitheoir Comhairleach moill ar na trialacha. Níl neart air seo agus tá sé riachtanach chun slánchúis na scrúduithe a chinntiú. **Is cóir a chur in iúl do na hiarrthóirí nach féidir leo a bheith ag súil leis go gcuirfear faoi scrúdú iad ag am ar leith ná ar lá ar leith.**
7. Ní mór do na hiarrthóirí uile bualadh leis an Scrúdaitheoir ina ngrúpa nuair a thagann sé/sí go dtí an scoil. Iarrtar ar na scoileanna a dhéanamh cinnte go gcuirtear in iúl do na hiarrthóirí go bhfuil sin riachtanach, agus go gcuirtear seomra oiriúnach ar fáil don chruinniú leis an ngrúpa.
8. Ós triail cheolchasaídh í seo, ní mór a bheith cúramach agus ionad na scrúduithe á réiteach.
 - **Ní mór ionad na scrúduithe a bheith in áit sa scoil atá saor ó thrup agus ó chur isteach ó mhic léinn eile agus ó fhógraí ar an ngléas idirchumarsáide.**
 - Ba chóir na trialacha ceolchasaídh go léir a chur ar siúl i seomra/halla amháin sa scoil. Má roghnaítear an teicneolaíocht mar ghníomhaíocht cheolchasaídh, caithfear an ríomhaire/trealamh a úsáidfear sa triail a bheith leagtha amach roimh ré, gan é a bheith nasctha leis an idirlíon ná le líonra logánta ná le *wifi*. I gcúinsí eisceachtúla, e.g. más ar an bpíborgán a bheidh an t-iarrthóir ag seinm, ligfear don iarrthóir aistriú go hionad eile. Caithfear é seo a chur in iúl do Choimisiún na Scrúduithe Stáit roimh ré.
 - I gcás na scrúduithe teicneolaíochta, moltar go mbeadh teicneoir/múinteoir teicneolaíochta i láthair chun cliseadh córais nach bhfuil neart ag na hiarrthóirí air a réiteach.
 - Beidh pianó nó méarchlár maith a tiúnadh ar na mallaibh de dhíth leis na trialacha amharcléimh don phianó/mhéarchlár a dhéanamh.
9. Tá cead ag an bPríomhoide nó ag a (h)ionadaí a bheith i láthair le linn scrúdú, mar a shonraítear in *Cód Cleachtais i gcomhair Béaltrialacha agus Scrúduithe Praiticiúla*.
10. Níl cead ag na hiarrthóirí ná acu siúd a bheidh á dtionlacan fón póca a thabhairt isteach sa scrúdú ar chúis ar bith.
11. Níl cead ag an scrúdaitheoir aon chuid den scrúdú a phlé le haon duine. Aon cheist a bheidh ag aon duine faoin scrúdú, is cóir í a chur ar Choimisiún na Scrúduithe Stáit.